

EXPEDIENTE:	2026/00031033K
PROCEDEMENTO:	Xestión de subvencións nominativas

PROPOSTA DE CONVENIO

CONVENIO DE COLABORACIÓN ENTRE O CONCELLO DE SANTIAGO DE COMPOSTELA E A ASOCIACIÓN SOLIDARIEDADE GALEGA CO POBO SAHARAUI PARA O DESENVOLVEMENTO DO PROXECTO DE ACOLLEMENTO FAMILIAR TEMPORAL “VACACIÓNS EN PAZ 2026”

En Santiago de Compostela, na data da sinatura dixital.

COMPARECEN

Dunha parte, a Excm. Sra. Dona Goretti Sanmartín Rei, que actúa en nome e representación do CONCELLO DE SANTIAGO DE COMPOSTELA, do que é Alcaldesa. E doutra parte, dona María Isla Avión, Presidenta da Asociación Solidariedade galega co Pobo Saharai (SOGAPS), actuando en representación da Asociación SOGAPS, segundo así resulta da certificación do acordo adoptado na súa Asemblea xeral extraordinaria do 23-12-2013 e dos seus estatutos, asegurando a comparecente que tales facultades non lle foron revogadas.

Comparece a primeira en calidade de Alcaldesa-Presidenta, en nome e representación do Excmo. Concello de Santiago de Compostela (en adiante Concello), con CIF P-1507900-G, e domicilio na cidade de Santiago de Compostela, Pazo de Raxoi-Praza do Obradoiro, en tanto que a segunda actúa en calidade de Presidenta da Asociación Solidariedade galega co Pobo Saharai (SOGAPS), CIF G15924558, con sede social na Avda. Gregorio Espino 57, baixo en Vigo.

Ambos comparecentes recoñécense mutuamente capacidade plena para o presente outorgamento na condición en que respectivamente interveñen e, en consecuencia,

EXPOÑEN

I – Que a Asociación SOGAPS é unha ONG, inscrita no Rexistro de Asociacións da Xunta de Galicia co número 2004/007037 que ten entre os seus fins promover o entendemento e desenvolvemento dos vínculos de amizade entre os Pobos galego e saharai, auspiciar iniciativas que favorezan o intercambio cultural, social, económico e político e propiciar e desenvolver proxectos de asistencia humanitaria e programas de cooperación co pobo saharai.

II – Que esta Asociación vén desenvolvendo co Concello de Santiago desde hai anos un importante labor coa realización do Programa de acollemento familiar temporal denominado “Vacacións en Paz”, que posibilita o desprazamento de nenos e nenas saharais desde os campamentos de refuxiados de Tindouf (Alxeria) ata a nosa

cidade para seren acollidos por parte de familias santiagouesas durante os meses de xullo e agosto.

Facilitarlles asistencia médica e alimentación, evitar a súa estadía nos campamentos durante eses meses de verán nos que se acadan temperaturas de máis de 50º C no deserto, ofertarlles unha alternativa de lecer e tempo libre así como sensibilizar sobre a situación do Pobo saharai son algún dos obxectivos que se pretenden con esta iniciativa.

A Asociación SOGAPS conta co recoñecemento do goberno saharai para a realización deste proxecto, sendo a única asociación autorizada para lévalo a cabo en Galicia.

III – Que o Concello de Santiago, tendo en conta as razón de tipo humanitario e solidario implícitas neste proxecto de acollemento de nenos e nenas saharauis Vacacións en Paz, xustifica e considera conveniente a concesión da subvención prevista. As Administracións públicas deben apoiar, na medida das súas posibilidades, as actitudes solidarias; apoio que se traduce, no caso concreto, na concesión dunha subvención que faga posible o desprazamento destes nenos e nenas ata a nosa cidade.

IV – Que a normativa de réxime local (art. 25.1 da Lei 7/1985, do 2 de abril LRBRL e Art. 80.1 da Lei 5/1997, do 22 de xullo, de administración local de Galicia) prevé que os municipios, para a xestión dos seus intereses e no ámbito das súas competencias, poden promover actividades e prestar os servizos públicos que contribúan a satisfacer as necesidades e aspiracións da comunidade veciñal, asumindo como competencia propia, entre outras, a avaliación e información de situación de necesidade social e a atención inmediata a persoas en situación ou risco de exclusión social; servizo declarado obrigatorio para os municipios de poboación superior a 20.000 habitantes (art.25.2.e e 26.1.c da LRBRL, na redacción dada pola lei 27/2013, do 27 de decembro LRSAL).

A teor da reforma introducida pola Lei 27/2013 do 27 de decembro, de racionalización e sostibilidade da administración local (LRSAL), a competencia en materia de “prestación dos servizos sociais, promoción e reinserción social” residenciase agora na Admon. Autonómica. Así e todo, a Lei 27/2013 aprobada polo Parlamento de Galicia na súa sesión plenaria do 27/5/2014 (DOG nº 102, do 30/5/2014), considera que “non se entenderá como exercicio de novas competencias”, entre outras, a continuidade na prestación dos servizos xa establecidos e da actividade de fomento e a formalización de convenios de colaboración de concesión de subvencións (Art. 3.3).

V – Que a Lei 13/2008 do 3 de decembro, de servizos sociais de Galicia, atribúe competencias aos concellos nesta materia e prescribe que os poderes públicos fomentarán no ámbito dos servizos sociais o desenvolvemento de actuacións solidarias por entidades de iniciativa social sempre que se axusten aos requisitos de autorización, calidade e complementariedade establecidos na lei e que o cumprimento dos fins das entidades de iniciativa social promoverase mediante o outorgamento de subvencións, que se concederán atendendo ao interese social dos distintos servizos e proxectos, á súa complementariedade coa oferta pública de servizos sociais, á calidade e ao carácter innovador das prestacións de servizos ofertados, á eficiencia no emprego de fondos públicos e á súa adecuación aos obxectivos fixados pola planificación autonómica en materia de servizos sociais.

De feito, a propia Lei 13/2008 posibilita que, sen prexuízo da aplicación ordinaria do réxime aberto de concorrência competitiva na xestión das subvencións, por razóns xustificadas de interese público poderanse subscribir convenios singulares con entidades de iniciativa social debidamente autorizadas para a prestación de servizos

sociais cando por razóns humanitarias ou de emerxencia social, ou ben cando pola singularidade das características da entidade, a especificidade dos servizos que presta ou a especial vulnerabilidade das persoas usuarias, non sexa posible ou conveniente promover a concorrência pública.

VI – Que a subvención que se instrumenta mediante este convenio de colaboración está prevista nominativamente nos orzamentos municipais, polo que ten a consideración de subvención directa segundo o disposto nos art. 22.2 e 28 da Lei 38/2003, xeral de subvencións e 19.4 e 26 da Lei 9/2007 de subvencións de Galicia e, a máis abundamento, acredítanse razóns de interese público, social e humanitario para a súa concesión, en tanto que destinada a cofinanciar os gastos derivados dos desprazamentos de menores refuxiados do Sáhara occidental, nenos e nenas, nados en exilio, que sobreviven nunhas condicións de vida moi difíciles, con grandes carencias sanitarias e alimenticias, nun contorno de conflito armado e que precisan da axuda externa para sobrevivir.

O presente convenio de colaboración contempla as prescricións que sinalan as bases de execución do orzamento do Concello de Santiago para o exercicio 2026, no senso de afirmar que a tramitación do expediente cumpre tódolos requisitos establecidos na normativa de aplicación e nas presentes bases de execución.

VII – Que o presente convenio de colaboración contempla as prescricións das bases de execución do orzamento do Concello de Santiago para o exercicio 2026.

Que en base ás precedentes consideracións e ao interese social e humanitario que para o Concello de Santiago representa a actividade da Asociación SOGAPS, as partes intervincentes conclúen este convenio a fin de regular os termos da concesión da precitada subvención de acordo coas seguintes,

ESTIPULACIÓNS

PRIMEIRA. Constitúe o obxecto deste Convenio de colaboración a regulación dos termos da concesión da subvención directa prevista nominativamente nos orzamentos xerais do Concello de Santiago a favor da Asociación Solidariedade galega co Pobo Saharaui para o desenvolvemento do Programa de acollemento de nenos e nenas saharauis denominado Vacacións en Paz, que consiste no traslado a Santiago de nenos e nenas saharauis procedentes dos campamentos de refuxiados de Tindouf (Alxeria) para pasar dous meses de verán acollidos por familias santiaguesas. O número total de beneficiarios/as estará en función do custo do traslado e da cantidade subvencionada.

SEGUNDA. Para estes efectos, a Asociación SOGAPS comprométese a colaborar coa Concellaría de Educación do Concello de Santiago nese traslado dos menores desde Alxeria ata Santiago para pasar o verán acollidos en familias da nosa cidade e, especificamente:

- 1) A buscar e seleccionar ás posibles familias acolledoras.
- 2) A asignar os menores ás familias seleccionadas, así como a solicitarlles a documentación esixida tanto pola Subdirección do Menor da Xunta de Galicia como pola Subdelegación do Goberno. A Asociación comprométese tamén a facilitarlle ao Concello de Santiago o nome, enderezo e teléfono de contacto das familias acolledoras.
- 3) A facer un exhaustivo seguimento do traslado dos menores desde Alxeria á nosa cidade, conxuntamente coa Delegación saharai para Galicia.

- 4) A asegurarse de que as familias realizan as correspondentes revisións pediátricas aos menores por mor do convenio asinado coa Consellería de Sanidade e seguindo os criterios e parámetros marcados pola Comisión médica da asociación SOGAPS.
- 5) A dispor o necesario para subscribir as pólizas de seguros que garantan a cobertura de todos os aspectos da actividade.
- 6) A cumprir, en xeral, coas obrigas consignadas para as beneficiarias das subvencións no artigo 11 da Lei 9/2007 de 13 de xuño, de subvencións de Galicia.
- 7) A someterse ás actuacións de comprobación que estime oportuno efectuar a entidade concedente, cumprindo todas as obrigas en canto á presentación da Memoria, xustificación dos gastos e cumprimento de obxectivos.

TERCEIRA. O Concello de Santiago, pola súa parte, comprométese a conceder directamente á Asociación SOGAPS unha subvención para o exercicio 2026 por importe de 8.000,00 euros, prevista nominativamente nos seus orzamentos (aplicación 080 32600 4890001) para a execución do Programa de acollemento de nenos e nenas saharauis “Vacacións en Paz” 2026.

CUARTA. Serán gastos subvencionables os que de xeito indubitado respondan á natureza da actividade subvencionada e se realicen durante a VIXENCIA do convenio (ano 2026).

QUINTA. Esta subvención será compatible con calquera outra subvención ou axuda para a mesma finalidade procedente de calquera outra Administración ou de entes públicos ou privados, nacionais, da Unión Europea ou de organismos internacionais.

Con todo, a beneficiaria deberá comunicar ao Concello de Santiago a obtención doutras posibles subvencións, axudas, ingresos ou recursos que financien a actividade subvencionada. Esta comunicación deberá efectuarse no momento en que se coñeza e, en todo caso, con anterioridade á xustificación da aplicación dada aos fondos recibidos.

En calquera caso, o importe total da subvención ou subvencións non poderá superar o da actividade subvencionada; caso no que se procederá na forma prevista no art. 34 do RD 887/2006 do 21 de xullo.

SEXTA. Se o custo total da actividade subvencionada resultase ser menor que o contemplado para a concesión da subvención ou se reducisen na execución da actividade subvencionada as actuacións ou elementos previstos como integrantes da mesma, procederá a redución da subvención na mesma proporción.

A comunicación destas circunstancias ao Concello deberá efectuarse no momento en que se coñeza e, en todo caso, con anterioridade á xustificación da aplicación dada aos fondos recibidos.

SÉTIMA. Para a xustificación da subvención a entidade beneficiaria deberá achegar con data límite do 6 de novembro de 2026, a xustificación do cumprimento da finalidade para a que se lle concedeu e a aplicación dos fondos recibidos, xunto coa seguinte documentación integrante da conta xustificativa simplificada:

1. Memoria de actuación xustificativa do cumprimento das condicións impostas na concesión da subvención, con indicación das actividades realizadas e dos resultados obtidos.
2. Unha relación clasificada dos gastos da actividade, con identificación do acredor e do documento, o seu importe, data de emisión e, no seu caso, data

de pagamento. As facturas deberán recoller o número de CIF, a data, número de factura e o IVE. Estes xustificantes quedarán a disposición do Concello de Santiago. Non se admitirán facturas que non reúnan as esixencias previstas na normativa reguladora das obrigas de facturación (R.D. 1619/2012, do 30 de novembro). Será esixible a achega de facturas electrónicas e/ou copias dixitalizadas compulsadas das facturas orixinais en papel, reflectíndose nunha táboa todos os gastos acreditados mediante as mesmas, indicando o importe que se imputa á subvención (total/parcial).

3. Declaración responsable acreditativa dos seguintes extremos:

-Que os xustificantes acreditativos dos gastos que se presenten se aplicaron á actividade subvencionada.

-Que foron aboadas aos seus expedidores ou, no seu caso, aos titulares do dereito que incorporan.

-Que se atopa ao corrente das súas obrigas tributarias e coa Seguridade Social, para os efectos previstos no artigo 31 da Lei 9/2007, de subvencións de Galicia.

4. Un detalle doutros ingresos ou subvencións que financiaran a actividade subvencionada con indicación do seu importe e procedencia.

5. No seu caso, carta de pagamento do reintegro no suposto de remanentes non aplicados, xunto cos xuros derivados dos mesmos.

OITAVA. Antes de proceder ao pagamento da subvención a beneficiaria deberá acreditar estar ao corrente das súas obrigas tributarias e coa Seguridade Social e non ser debedora por resolución de procedencia de reintegro, o que poderá realizar por medio dunha declaración responsable, ao abeiro do art. 31.7.e da lei 9/2007, de subvencións de Galicia.

NOVENA. A axeitada xustificación da subvención, a realización da actividade subvencionada e o cumprimento da finalidade que determinou a concesión será comprobada polos servizos da Concellaría de Educación. O/a responsable técnico/a do Programa emitirá informe ao respecto facendo constar, no seu caso, todas aquelas circunstancias que poidan resultar relevantes en orde a considerar incumplida ou defectuosamente cumprida a actividade subvencionada.

DÉCIMA. A beneficiaria deberá facilitar toda a información que lle sexa requirida pola Concellaría de Educación e pola Intervención xeral municipal, Tribunal de Contas e Consello de Contas no exercicio das súas funcións de fiscalización e control do destino das subvencións.

DÉCIMO PRIMEIRA. Procederá o reintegro das cantidades percibidas e a esixencia de xuros de mora desde o pagamento da subvención ata a data na que se acorde a procedencia do reintegro nos casos do artigo 33 da Lei 9/2007. Cando o incumprimento da actividade subvencionada se traduza nunha diminución significativa desta, traducible a termos económicos en función do proxecto presentado e o seu orzamento, pero que non implique verdadeiro incumprimento do obxectivo da subvención, procederá o reintegro na mesma proporción. En todo caso procederá o reintegro do exceso da subvención sobre o custo da actividade subvencionada.

DÉCIMO SEGUNDA. Como mecanismo de coordinación e solución de posibles controversias na súa aplicación, constituirase unha Comisión mixta de Seguimento do convenio que estará composta por dous representantes da Asociación SOGAPS e dous representantes municipais e presidida pola Concelleira de Educación.

DÉCIMO TERCEIRA. Son causas de resolución deste convenio, de acordo coa lexislación vixente, o incumprimento de calquera cláusula establecida no mesmo, e concretamente:

- a) Forza maior que imposibilite o desenvolvemento das actividades programadas.
- b) Incumprimento das cláusulas establecidas no convenio específico de colaboración.
- c) Mutuo acordo entre as partes.
- d) O vencemento do seu prazo.

DÉCIMO CUARTA. O presente convenio de colaboración ten natureza administrativa e está expresamente excluído do ámbito de aplicación da Lei 9/2017 de Contratos do Sector Público, segundo o sinalado no seu art. 6 sen prexuízo da súa posible aplicación con carácter supletorio.

Non obstante o anterior, as cuestións litixiosas que poidan xurdir sobre este convenio, respecto da vixilancia e control, interpretación, resolución e efectos do mesmo, serán resoltas en última instancia administrativa pola Xunta de Goberno da cidade de Santiago de Compostela, poñendo os seus acordos fin á vía administrativa e contra eles poderá interpoñerse recurso contencioso-administrativo, segundo establece o artigo 46.4 da Lei 29/1998, reguladora desta xurisdición. Para este efecto, será competente o Xulgado do Contencioso Administrativo de Santiago de Compostela.

DÉCIMO QUINTA. Canto ás infraccións e sancións en que poida incurrir a beneficiaria da subvención e ao procedemento para a súa apreciación e imposición, estarase ao disposto no Título IV da Lei 9/2007, do 13 de xuño, de subvencións de Galicia e nos preceptos da LRXSP (lei 40/2015) e da LPACAP (Lei 39/2015) relativos ao exercicio da potestade sancionadora.

DÉCIMO SEXTA. De acordo co disposto no artigo 18.4 da Lei xeral de subvencións deberase dar axeitada publicidade do financiamento do Departamento de Educación do Concello de Santiago de Compostela para este convenio (tanto na comunicación oral, na dixital como na escrita). Para tal efecto, o Departamento de Educación facilitará á Asociación SOGAPS o logotipo oficial que deberán utilizar na documentación e información visual, e escrita. Así mesmo, de conformidade co establecido no artigo 18 da Lei 38/2003, de 17 de novembro xeral de subvencións, o presente instrumento de colaboración e a información sobre a subvención serán comunicados á Base de Datos Nacional de Subvencións (BDNS).

DÉCIMO SÉTIMA. A concesión da subvención obxecto deste Convenio rexeráse pola Lei 38/2003 do 17 de novembro, xeral de subvencións e o RD 887/2006, do 21 de xullo, polo que se aprobou o seu Regulamento, nos seus preceptos básicos; a lexislación básica do Estado en materia de réxime local; a Lei 9/2007, de subvencións de Galicia; os preceptos non básicos da Lei 38/2003 e do RD 887/2006; polos pactos que se conteñen neste Convenio; as bases de execución dos vixentes orzamentos municipais e as restantes normas de dereito administrativo, e no seu defecto, as normas de dereito privado.

DÉCIMO OITAVA. O presente convenio estará vixente durante o ano 2026.

Os comparecentes, no seu concepto no que o fan, dan a súa conformidade ao presente convenio de colaboración, asinándoo de xeito electrónico nas datas expresadas en cada unha das sinaturas.

Polo Excmo. Concello de Santiago de
Compostela

Pola Asociación SOGAPS

Goretti Sanmartín Rei

María Isla Avión